


續
碑
傳
集



續碑傳集卷八十一

江陰繆荃孫纂錄

文學六

丁君松生家傳

俞樾

丁君諱丙字嘉魚別字松生晚年自稱松存浙江錢塘人其先世居山陰福巖村有諱瑞南者當順治初土寇蠡起瑞南妻周挈二子行遇寇揮二子去自投水死世稱丁烈婦事見曾文正公所撰墓表嗣後遂遷居杭州蓋距君七世矣曾祖諱軾祖諱國典皆以君父官

封中議大夫父諱英字洛者候選同知加道銜道光二十九年浙西大水爲粥以食餓者巡撫吳文節公書任恤可風四字表其門生二子長諱申字竹舟次卽君也初入塾卽爲塾師奇賞曰此子後必有成年二十三年入杭州府學其時粵賊已據金陵江浙大聳洛耆公避居新城俄而病母姚恭人同日病皆店也君刲臂肉羹以進姚恭人愈而洛耆公竟不起逾二年姚恭人又病再刲臂則無效矣君連丁大故哀感行路嘉興張子祥爲繪風木奩圖十年春粵寇犯杭君與兄竹舟君糾合城中錫箔之工得千餘人助戰守城陷猶與巷戰杭城舊有上下之分上

城焚掠甚酷而下城稍安帖箔工之力也君避亂轉徙松江青浦南匯
上海諸處時蘇之難民雲集於松滬君集同志出貲財施糜粥及藥餌
亂民中有童子七八百人皆分別安頓使無失所松之陷也竹舟君先
以眷屬行君以施粥事後之與賊遇賊三發火槍皆不中騁而追之馬
忽蹶君得以免蓋有神祐焉明年仍回杭州創崇義祠纂崇義錄以表
章死事之烈又以賊之攻城每取攢盾之柩爲築壘填濠之用與舅氏
陸君設三學局凡學中貧士死而未葬者購地爲之葬然其時蘇省淪
陷杭勢益孤寇日深而食且盡君獻議刮醬坊之麪以濟民食卒以食
盡不能守君渡江至蕭山時渡者如蟻舟子索錢不滿其欲者投之江
皆大號君代給之乃畢渡出城時與竹舟君相失至陶堰見其題壁字
始知其在留下乃往從之卽於留下設肆鬻米訪求親串之自城出者
留下市中賣物率以字紙包裹取視皆四庫書也驚曰
文瀾閣書得無零落在此乎隨地檢拾得數十大冊君之蒐輯
文瀾遺書實始此矣於其閒偕竹舟君至福巖村拜埽祖墓因自紹興
至定海而上海而如皋倉皇奔走猶託書賈周姓者閒道至杭州購求
書籍其裝訂成本者十之一餘則束以巨緘每束高二尺許共得八百

束皆載之至滬又自滬至普陀禮觀世音聚千僧誦佛號以明處士崔青蚓所畫應真十五尊施惠濟寺冀銷劫運存者亡者皆得安樂同治三年杭城復君自滬歸杭浙撫左文襄公素知君賢卽召入見語之曰君輿論甚美必有材智地方應爲之事具爲我籌之自是而君所設施皆在杭矣最君一生之事大端有二曰存文獻曰籌教養君旣於灰燼中掇拾得

文瀾遺書乃奉歸皮之尊經閣請陸君弼珊繪書庫抱殘圖紀之其時文瀾閣毀於兵未復也光緒六年巡撫譚公建復

文瀾閣爰有鈔補閣書之議君悉出其家藏書集人逐寫又於天一閣抱經樓振綺堂壽松堂諸藏書家按籍徵求歷七年之久得三千三百九十六種求而未得者僅九十餘種譚公疏陳其事言丁申丁酉兄弟於兵戈擾攘之際尙能搜求遺書購覓底本俾後進得窺內府遺編其識迴越尋常所費亦難以數計可謂篤行敦本之士於是天語褒揚士林歎誦兩丁君之名赫然聞於天下君又以尊經閣亦不可無書乃於家藏中重出之本得如千種又乞諸朋舊購之市肆得如千種藏皮閣中焉君先世本富藏書君祖掌六公有八千卷樓至君又

益以二樓曰後八千卷曰小八千卷然辜較君所藏固不止三八千也君以

天語有嘉惠士林之獎因總名藏書之所曰嘉惠堂乃擇士林所罕見者刻以傳播取其有涉杭郡掌故者都爲一編曰武林掌故叢編凡一百餘種君又以武林爲南宋故都城坊巷之名由來久遠居其地者口不能言因創爲杭城坊巷志數十卷編纂脩定曰吾精力日衰恐不足了此屬其友孫峻字康侯者踵成之至今年春寫定可刻君易簀前又語康侯曰吾生前必不見其成矣子姑徐之取吾嘉惠堂書宋元以後詩文諸集再一繙閱以三年爲期當益精美嗚呼君一生用心不苟卽此可見矣城內外古蹟如蘇祠白祠錢武肅祠岳忠武祠于忠肅祠林處士祠宋校尉施全祠楊侯再興祠徐巨翁忠節祠王項二公揚清祠宋行人朱弁墓胡公則龍井祠墓陳忠肅墓張楊園先生墓陸清獻公墓郭孝童墓孫花翁墓或言於官或出己貲一律修葺又如修文蘆庵而以高邁庵奚鐵生戴文節諸先生名蹟置其中建玉照堂並爲補種梅花得元大德年編鐘而建元音亭得宋咸平年貝葉經文歸之雲林寺得錢忠懿王金塗塔歸之靈隱昭慶諸寺一時韻事杭人尤豔之

自君之亡而故書雅訓無所咨訪名山勝地日就淪落所謂存文獻者此也杭爲東南大都會人文甲天下大亂之後學校荒蕪君與同人創設下祭局集諸生供灑埽治祭器考訂禮器樂器創修府仁錢三學志又建道統石室以宋理宗御製道統贊碑石排列室中缺文王一贊集他石字補之無則以偏旁配合而成字乃至光緒十八年於尊經閣後圃土中掘得一石則文王贊也浙中盛傳皆歎爲

文治光昌之兆君自左文襄以善後事見屬卽設立振撫局難民局掩埋局施材局醫藥局牛痘局錢江義渡局救生局凡各局無慮數十處皆以君總之杭故有普濟堂始於阮文達公成之者蔣撫軍攸鈕高撫軍杞李觀察坦與里人高宗元丁燾至是復建官則蔣果敏公高都轉卿培李司馬國賢而紳士則君也先後六十年四姓符合人皆異焉同善堂者光緒閒左文襄所創其時普濟堂未復故創設此堂嗣是普濟同善與育嬰三堂並建皆君主之而善舉益備推廣其意隨宜施設以杭多火災而置卹災所以杭多游惰之民而置遷善所以庚申之亂死難者眾而築義烈遺阡以亂後民間子弟無力延師而設正蒙義塾以吏胥於命案多需索而置報驗所以民間緩急無所資而置借錢局以

民閒節婦不能概至清節堂而倡爲穗遺集以補所不及以育嬰堂所顧乳媪有限而廣爲寄養以濟其窮又於城內外設粥廠七所使貧民冬日無枵腹之虞設丐廠使行乞之流不致溝壑之患何其用意之周歟浙西所重尤在水利城中開新橫河築新壩城外濬北河南湖修仁和至海甯上河隄壩修奉口陡門君皆與焉西湖常年設濬湖局余每宿湖樓平旦必聞其鳴鑼集眾也義倉之事主之尤久世俗以私意窺測疑倉穀不無虧耗及己丑之秋浙西霖雨爲災中丞崧公委君散振平糶盡發其粟越九年戊戌春米價翔貴發粟平糶糶至三萬餘石而倉穀未及其半浮言爲之頓息所在橋梁如慶春寶善龍光拱宸所在祠宇如李敏達阮文達左文襄蔣果敏經君之手無不完固杭自收復以來士風振起民力寬紓皆君力也袁君爽秋紀其大者凡二十八事所謂籌教養者此也君淡於榮利在同治間左文襄特薦於

朝有鉅細咸宜之目得

旨以知縣發往江蘇後又敘功加同知銜江蘇諸大吏皆敦勸出山而君不顧也然以受

恩深不敢膜視時艱遇直隸山東山西河南各行省偏災浙省設局籌

振君必力任之戊戌歲元旦日食君以

天子且有減膳之詔況在民庶乃屏葷血不御諸子以有妨頤養力勸
不從居恆與寒素無異惟以圖籍自娛所著有讀禮私記禮經集解松
夢寮詩初集皆毀於兵火餘若九思居經說說文部目詳考說文篆韻
譜集注二十四史刻本同異考樂善錄于忠肅公祠墓錄善本書室藏
書志武林金石志皋亭山志宜堂小記松夢寮集北郭詩帳西溪詩集
皆藏於家其已刊行者西泠四家印存一卷師讓盦漢銅印存一卷北
隅齋錄續錄各二卷續東河權歌一卷三塘漁唱三卷庚辛泣杭錄十
六卷又菊邊吟一卷則去年病中作也吳退盦先生爲武林老輩有
國朝杭郡詩輯其孫仲雲制府又有續輯君廣其未備而爲三輯推之
前代而爲歷朝杭郡詩輯又因吳志上先生武林文獻殘本重加增補
爲內外二編杭人之文爲內編文之爲杭地杭人作者爲外編皆行於
時君天性篤厚與兄竹舟君白首無間其卒也淒然不勝人琴之感先
是洛耆公擬建宗祠未果君與竹舟君成之舊譜毀重輯之杭紹先隴
積圯者修之亂後親族中未葬之棺以數十計悉爲葬之宗祠之右設
家塾課子弟羣從昆弟皆視如同產前巡撫譚公稱君爲敦本篤行之

士洵不虛矣六十五歲時得痰眩之疾時劇時差逾二年又患脾泄光緒二十五年三月丙辰卒於家年六十有八凡三娶曰沈曰凌曰陸側室三曰王曰孫曰王子三人長立中光緒十七年舉人次立方次立亢殤女四人延適仁和陸氏恆適仁和顧氏苓適錢塘陳氏祺未嫁字仁和陸氏孫一人天佑孫女一

余既爲君立家傳乃論其後曰杭城克復以來三十餘年湖山歌舞粗復其舊固由諸大吏振興於上賢有司經畫於下而拮据搢搢心口交瘁蠹沒從事使公私交受其益者則君一人也君有官不赴伏處鄉里而惠澤被乎四方聲名動乎朝野求之古人未可多得微論劉勝寒蟬不堪比擬卽王烈陽城輩徒以德化其鄉者亦不能尸居龍見若斯也君臨終有詩云分應獨善心兼善家守清貧書不貧夫子自道得其實矣

內閣中書劉君墓志銘

王耕心

光緒二十七年正月戊辰南豐劉先生終於南清河夏六月歸葬其縣之某鄉某原而公子孚存來乞銘耕心曰先生不屑爲外吏惟以植道義崇經術爲務不朽之業已獲其二則於法宜銘後學其奚辭謹按先

生諱庠字慈民晚號鈍叟姓劉氏江西南豐人祖父衡故開歸陳許兵備道道光中以循吏名時稱簾舫先生

國史循良有傳考良駒故兩淮都轉鹽運使先生由咸豐元年舉人授內閣中書舍人充

國史方略館校勘官同治五年都轉公卒先生以憂歸輒謝病不復仕游江南主徐州雲龍書院講席徙海州敦善書院再徙南清河崇實書院及卒年七十有八先生少居京師門祚方鼎盛而惓惓向學不知有子弟遨放事嘗受業於湘鄉曾文正公爲人躬躬如畏孝友篤誠不慕榮利頗得文正之傳文正方討粵匪時議招先生入幕府先生不敢決文正將移師祁門爲留行以待且屬李布政元度及故大學士李文忠兩公來道意而先生以都轉公意不欲去左右竟謝不往其後文正門下士皆出入將相以功名顯當世惟先生以講授終老無悔也故人朱觀察琦從軍浙江先生過之觀察留先生贊軍務且籌厚糈贍其家先生念母夫人在堂如就職守且不得歸省復辭去後數月而浙江陷觀察及巡撫皆遇害先生獲免當是時先生方困家計如以規利祿辭親遠游且及於難其自守如此則志趣可知已平居事親能盡色養都轉

公嘗避地滁州先生朝夕在側每以稱古今誦經史爲愉俾都轉忘轉徙之憂其處昆弟戚友輒量力紓其乏己所不欲未嘗加人每日吾所學不足道惟於忠恕二字稍有體會蓋實錄也爲文昭曠清澈不析門戶少好考證晚復致力兩宋諸子書常手書羣經全文雖篤老無倦色藏書萬卷丹黃殆徧嘗與陽湖方元徵同撰徐州府志創闢義例糾謬繩愆世以爲精當所著書別有周易詁說文校詁及詩文集等總若干萬言藏於家先生嘗言少遇異人預必其行履之隆替後數十年無差異然先生抱道懷藝不失尺寸未嘗蹈流俗以自貶損也嗚呼其可謂篤行君子矣配吳宜人子二孚同廩膳生孚存附監生皆能以文學世其家銘曰

克孝其親以質天人克充其神以覺天民漢學匪故而兩宋匪新漢宋兼資是爲道義之醇君子彬彬其鑒茲百世之貞珉

雲自在齋筆記

晚年自號鈍叟嘗手寫十三經復自號寫十三經老人每見後生子弟之俊異者必勸以多讀有宋諸子書庶可以挽末流而轉移風氣也性和易門生後進及子弟來謁者往往引與談笑或說歷代掌故國朝軼

事文獻娓娓無遺忘所著書曰儉德堂易說說文蒙求說文諧聲表後漢郡國職官表唐藩鎮名氏表通鑑校勘記班許水道類記意林補文選小學讀書隨筆漢魏音補輯儉德堂文集紫芝丹荔山房詩集凡十餘種

莊仲求小傳

譚廷獻

莊君士敏字仲求爲武進望族世有名德父煜咸豐二年舉人字晴谷客中獻接於分水史令君官齋與聞常州諸老問學源流實始於此時爲咸豐七年納交仲求則同治之初君退然孺子之色仁孝人也方常州兵事亟君母氏殉變最烈事具君先妣事略比寇難稍定孤子泣血尋求遺骸封土識之後建家祠卽其地也性好交游杭州道義之友有許增邁孫張景祁韻梅皆雄駿君子客於荷澤馬公湘鄉楊公書檄旁午而獻過其齋簡策鱗次丹黃不去手方治三國志斟正博碣夙昔未聞者也尤精駢麗文洞明晉宋以下正變與獻語未嘗不引爲同聲有知聞異義則斷斷如也君困鄉舉以府同知官福建厯游幕府治軍理賦入聞見博遠故福建置吏待以國士君亦爲之盡與言侃侃不訶詘何督部璟引若師友會霞浦多盜乃以君高資行縣令莅官果銳治事

連日夜保甲法行萑苻之澤望風掃迹境內安枕夏六月曠徹輿蓋閔
祈雨降歲孰而君疾病遂卒於官夏時光緒五年年四十六耳君神明
湛然讀書致精應事則才謂開發不事苛細著書未成方試於吏遽以
喝死獻在皖聞君隊輿隕齒方馳書起居而不意君以死勤事也初君
從丁撫部治臺灣軍書論功擢知府牒下君已卒子澤詞蘊寬能讀父
書

故人譚獻曰君能思思齋遺文楊遜阿大令著錄十篇在大亭山館叢
書淵乎何朗詣也遜阿與君洎吾鄉楊雪漁編修在浙江撫部幕府三
人者同校李申耆先生駢體文鈔仲求尤精覈當以善本遺饌學子獻
謝官歸假二楊本過錄之蓋如見仲求顏色也

龍泉老牧傳

馬其和

龍泉老牧者合肥徐君子苓自署別號也君故號南陽字西叔一字毅
甫先世由南昌遷廬州世農也父欽多病早世性喜振施君方在姤有
道士修髯古貌自言遊峨眉來到門乞齋已忽不見家人報產兒故遂
小字曰道士歧嶷穎異涉學多通既孤貧不能自存太守劉耀椿奇賞
之期以國士為資給其家少喜讀易及老莊孫武書究心天下利病顧

視儕輩皆無出己上益放不自檢謂名業可立致年二十四舉於鄉入都獲交湘鄉曾文正公及邵郎中懿辰陳編修源充張石洲穆暨他知名士皆解帶寫誠羣流傾嚮然性故介特於時俗人不能容納尤貴顯者尤以氣轢之人以此畏其狂望風嫉之既困不得第歸而鬻文自活得錢復隨手散去久益困則以書抵故人於京師謂足下誠欲起僕之窮乎何不號於諸貴人之門曰合肥有徐生善鬻文苟羅而致之不苛以恆禮自時文試帖館閣賦牋表頌誄旁及兩漢三唐樂府與夫流俗俳諧祈神諛鬼藏嬌贈豔之作唯主人之命是聽計役而與償當其快意萬言之富唾手可辦苟非其人雖千金一字不得也蓋其困彌甚其自喜亦彌甚曾公典試江西使節過廬州詣君陋巷不值賦詩一章而去於是陳源充出守吉安再補池州君樂江南山水陳又故人也遂客其所當是時天下已大亂曾公治兵於長沙廣西寇既破武昌順流東下防江兵潰散寇遂據江甯四出侵擾安徽巡撫移治廬州江公忠源新立大功授巡撫馳入廬州治守禦陳源充已前解池州任被檄至廬州助守君方避寇亂鄉居聞陳至亟走存問甫入而城閉寇前鋒抵派河君留居圍城中廿餘日一日陳置酒飲君酒半慨然曰嘻子好言兵

迺恆飲何憚一見撫軍樹尺寸功衛鄉里因強之以見江公江公固夙
知君一見大喜曰何以教我迺者客有獻計籍富民財以招徠鄉勇鄉
勇果何如君曰鄉民自保衛皆無足當巨寇江公曰然然吾精兵皆留
江西今事急姑強子一行且聞子有老母又獨子不可徒死圍城中子
幸出爲我趣鄉勇來吾開門待戰事平還藉子草露布君旣感陳公之
言又重違江公乃許諾以筐縋城下冒圍出未幾城陷二公殉節死鄉
里富民聞前時議斂民財事雖不就皆爭齎齎君君用是益困居無所
向久之會公水陸大舉克安慶則遣人迎致君居三年江甯平兩淮洊
以無事君謂山中屋可葺田可耕也乃辭去到家解裝以所得金買黃
牛一頭私心自幸天若厭亂吾與是牛蚤作而夕休更十餘年卽死幸
矣因自號龍泉老牧龍泉者巢湖之濱其所居山名也歲比不登蝗大
起復飢驅四走風雪寒冱中酒成癯病比歸而牛死江淮之飢又作於
是乃太息曰皇穹不佑載掣余肘我牛不辰失左右手天邪盜邪孰終
余歟悲夫自是仍時時鬻文遊公卿間同治五年揀選得知縣不樂爲
吏改教職遷授利州學正未上事州牧游智開循吏也固要之往比至
聞學師爭諸生贄金薄厚笑曰是尙可爲邪徑去不顧光緒二年年六

十有五其夏有鴟鳥飛集書室侍者逐不去醢之越日二大鴟率羣小鴟數百棲園樹震撼牆屋格格有聲君曰此賈大傳所謂服鳥也吾其行矣遂卒君於醫卜相人之術一皆覃習尤雄詩筆著有敦良齋詩文存六卷配楊氏生子二長源伯次元叔才而早死君上世五傳皆單下至源伯乃有孫五人

馬其祖曰子客合肥聞其先輩有三怪之目蓋謂君暨朱默存王謙齋而三子及見王君年八十猶健爲詩述君行乞爲之傳且言君師事姚石父先生其文學亦乃傳業桐城子其勿辭果敏公英翰者起安徽州縣至巡撫故與君爲昆弟交一日君敝衣詣巡撫署果敏屣履出迎酒酣樂作君乃言曰大難初夷百廢待飭而君輩爲大官者固樂甚乎僕老罷殊不慣此因起趨出果敏亟謝曰謹受教卽命徹樂固請乃留其正辭不阿皆此類也今年余來合肥王君已前卒偶與李生國松讀君文歎其絕人又頗惜其多無聊應俗之作今誠能要刪之亦足以不朽李生請任校刻予乃錄存其文一百餘篇分類編次皆可觀而君子源伯適於其時持狀來謁文也蓋其年亦且七十矣因頗采君所自著文及王君語次之如此

亡友傳 譚廷獻

吳懷珍傳

吳懷珍字子珍錢唐人舉咸豐二年壬子鄉試考取教習少與周炳元
郁齋沈瑜崑生蔡鼎子鼎友善交譚獻仲修在癸丑會試報罷南旋時
從弟鳳藻方以一甲進士入翰林典試福建懷珍治古文辭習兵家言
粵寇起慷慨自負每與諸子登吳山高處席地痛飲日落無佗人悲歌
叱咤山谷應之下山嘿黑相掖持行吟不輟論兵主李廣文主蘇軾詩
學中唐有異議者面赤手拍案爭之必申其說乃罷新城袁生臥字雪
安懷珍中表尤權奇自喜賦五言詩絕似孟浩李白困甚走杭州懷珍
與譚獻外恆嫚罵先懷珍三年死懷珍公車數上當世名流傾倒者眾
仍歲被放久留都下則不得養母鳳藻仕宦亦久不進進退次且旅人
牢愁意氣亦少衰矣兵事日亟中外震動懷珍抱奇無以自表見日荒
燕遂中危疾卒於鳳藻邸舍旅殯妙光閣數年後嗣子正濂奉以歸葬
懷珍母妻當咸豐十年杭州陷日投水殉難一子九齡亦沒於水正濂
以兄子嗣當年吳山之游惟蔡鼎譚獻尚在懷珍撰著散佚譚獻刻待
堂文九首詩二十篇戊午後偶學填詞寓意輒工求之不可得矣